

մարտի էին, յանկարծակի երեւեցաւ նշան 'ի Տեառնէ . զի 'ի Ս . Սիօն 'ի քրիստոսազարդ սեանէ ջուր բոլխեաց վերուստ 'ի վայր : Եւ տեսեալ պաշտօնէից ազդ արարին ամենեցուն , և նոքա հասանէին անդր բազմութեամբ տեսանել զսքանչելիսն , զոր Տէր եցոյց հաւատացեոց զօրութեամբ իւրով յամօթ և 'ի նախատինս հակառակորդաց . և օծանէին ամենեքեան ջրովն և փառաւոր առնէին զԱստուած : Տեսեալ դքսին և զօրացն՝ ահիւ և դողութեամբ անկանէին 'ի Ս . Սիօն և առաջի սուրբ սեանն ծունր եդեալ խնդրէին զԹողութիւն 'ի Տեառնէ , և ժողովորդն կատարեաց զՏօն Տեառնընդառաջին ըստ Յայտնութեան 'ի փառս Քրիստոսի :

Այս նշան և զօրութիւն եղեւ առ Յուստոս հայրապետիւ : Իսկ յամին երկրորդի Մակարիոս անուն ոմն յաջորդեաց զաթոռն , եւ վերստին յուզեցաւ խռովութիւն 'ի մերձեւալ տօնին . եւ կայսրն դարձեալ առաքեաց զօրս շարժեալ 'ի բանսարկուէն , կատարել զտօնն ըստ կամաց իւրոց . հասին զօրքն , հայրապետն , դուքսն եւ այլ իշխանք , որք առաքեցան 'ի Թագաւորէն , զի տացեն կատարել բռնութեամբ զտօն Տեառնընդառաջին ըստ Ծննդեան , որպէս հրամայեալ էր Կայսրն : Յայնժամ երուսազէմացիքն պնդեալ նովին հաւատով և բազմութեամբ յեկեղեցիս հասանէին , և անկեալ առաջի սեղանոյն արտասուօք հայցէին զօղնութիւն 'ի Տեառնէ . որպէս եցոյց զզօրութիւն իւր յառաջնումն : Եւ էր աղաղակ մեծ և խռովութիւն յերուսազէմ . եւ ընտրեցին առ հատարակ զմահ քան կատարել զտօնս խղճիւ , եւ յեկեղեցիսն ոչ լինէր լսելի ձայն պաշտաման , այլ լալոց եւ ողբոց , եւ զինեալ զօրքն կային 'ի դուռս եկեղեցւոյ ահ արկանել . բայց նոցա չէր ինչ փոյթ : Տեսեալ հայրապետին և դքսին զջերմեռանդ հաւասան ժողովորդոցն , ձայն բարձեալ ասեն՝ դադարեսցի 'ի ձէնջ աղաղակդ և խռովութիւնդ , զի որպէս Տէր հրամայեսցէ այնպէս արասցուք : Եւ եպիսկոպոս ոմն ետես 'ի խորհուրդ պատարագին զնմանութիւն հրեշտակի 'ի Ս . Գողգոթայն և 'ի Ս . դուռն Տեառն . և եհաս մինչեւ յերկրորդ դուռն մատրան եւ եհար զաջ բազուկն իւր 'ի նա , և անդէն բեւեռեցաւ աջ Տեառն 'ի վերայ սեանն , և ինքն